



**SI MAN OGEN** : 1 Korinti 15:22, 51-58

**TEMA** : Doni Kematian

**TUJUN** : Gelah Moria:

- Meteh maka Jesus nggo naluken kematian ras mereken kemenangan.
- Ngangkai maka kematian e la man kebiarenken.

**METODE PA** : Mengisi Eulogy ras Sharing

### **Kata Penaruh.**

Umumna kiasat kalak ngarana kerna kematian, ianggap pantang ras mbiar kita melaskenka. Encakapkenca saja pe kita mbiar, mbiar kita kai si belasken kita e jadi. Umpamana: lit sekalak si sakit, nina man keluargana: "*nande-bapa mate ndai nge aku, ku pindo bandu kelengi pagi kempundu e.*" Mis nge nina nande e: "*ula bage ngerana nakku la tengka bage ibelasken.*" Ertina ngerana kerna kematian eme hal si tabu man banta. Mesera kal si akap jujur nangdangi kinata geluhta si ermasap-masap, mate. Umumna engkai maka kalak mbiar mate? Kai nge si ibayangkan kita kerna kematian? Lit kalak erpengakap adi enggo mate enggo dung, enggo titik, lanai lit kai pe si man arapenken. Kiniteken kalak Karo si pemena maka kalak si enggo mate lawes jadi begu, emaka lit kalak mperumah begu entah pe si ngasuhi begu jabu. Pengangkan kalak Karo si ndekah pe maka kalak si enggo mate lit denga kawitenna ras kalak si nggeluh emaka ibahan cibal-cibalen i bas kuburen. Erkiteken sie lit kalak si erbahan kuburen jilen asangkan rumahna tupung ia nggeluh denga. Perukuren si bage megati lit denga ngaruhna man ngawan perpulungen. I bas perpulungen Korinti pe lit pemahaman si la sue kerna kedungen manusia kenca kematian. Tupung Paulus meritaken Berita Si Meriah i Korinti enggo iajarkenna kerna keselamatan i bas Kristus ras kegeluhen si rasa lalap. Tapi reh ka pengajaren si papak ngataken maka labo lit kinikeken i bas si mate nari (ay.12). Tole pe nina bicara lit kin kinikeken e, uga dalanna kalak mate keke mulihi? Uga tempas kulana? Arah suratna, Paulus mereken pengelayasi kerna kecibal kalak si tek kenca mate.

### **Mpebagesi Pengangkan Kerna Ogen.**

Arah kitab 1 Korinti 15 Paulus mereken pengajaren si mbages man kalak Kristen kerna kematian. Nina Paulus dosa reh arah sekalak manusia, Adam; dosa e engkenai kerina kesusurena. Dosa mabai ku kematian, bicara la min ndai Adam ndabuh ku bas dosa labo lit kematian e. Erkiteken dosa Adam kerina manusia erdosa ras mate. Bagi kematian e reh arah sekalak jelma (Adam) emaka kinikeken i bas kematian nari pe reh arah sekalak jelma eme Jesus Kristus. Jesus Kristus eme Manusia si pemena keke i bas si mate nari. KinikekenNa eme jadi jaminen kinikeken kerina kalak si tek. Ibukaken Paulus sada rahasia si mbelin kerna kegeluhen si rasa lalap. Si pemena si perlu si eteh maka i bas wari kerehen Tuhan si peduakaliken labo pagi kerina manusia mate, tapi kerina pagi iobahken. Kita si nggeluh denga pagi bagepe kalak si enggo mate si tek man Jesus, kerina pagi iobahken Tuhan, iberekenNa kula si mbaru. Kula si mulia dengen tahan rasa lalap. Engkai maka kita arus iobah? Sabap kulanta i bas doni enda la seri ras kulanta i surga pagi. Adi kulanta si i bas doni enda ermasap-masap (fana) ras banci mate, tapi kula si arus ipakeken i surga eme kula si tahan rasa lalap (kekal) ras la banci mate. Jadi kulanta i bas doni enda la banci bengket ku surga, emaka iubahken Tuhan me kula ras tendintanta pe iobahNa jadi kula ras tendi si mbaru; kula si mulia, si badia, si banci bengket ku surga. Emaka kematian e jadi pintu bengket ku bas kegeluhen si rasa lalap.

Tupung kulanta pagi iobahken, kentsik ngenca prosesna, sengkemirep mata ngenca. Langa pe sempat manusia rukur kerna sie kula doni enggo iobah jadi kula surga, kula si

mulia. Emaka labo terukuri manusia uga cara Dibata ngobahken kita. I bas paksa e pagi terbegi me sora terompet si perpudina. I bas tradisi Israel, terompet iembus guna ndilo umat guna pulung. Bagepe i bas wari kerehen Tuhan e pagi terbegi me sora terompet erdilo guna mpepulung kalak si tek. Kenca bage kerina kalak si enggo mate si tek man Tuhan ipekeke. I je kuasa kematen lanai ergegeh, kematen lanai erbisa sabap kematen enggo italuken. Kemenangen ras geluh si rasa lalap jadi sekerajagenta. Erkiteken sie kematen lanai man kebiarenken. Kematen enggo jadi ende-enden keriahen, sabap kematen jadi pintun bengket ku bas kegeluhen si rasa lalap.

### **Pengkenaina.**

Konfesi GBKP ngataken: "kematian merupakan realitas kehidupan. Melalui kematian tubuh kembali ke tanah dan roh kembali kepada Allah. Kematian disebabkan oleh dosa." Arah konfesi enda si idah maka kematen eme realita geluh. Amin bage gia kematen la man kebiarenken. Paulus mabai kita ku bas sada kepastin maka lit kegeluhen kenca kematen, kegeluhen si rasa lalap, kegeluhen si terulin asangken kegeluhen si lit i bas doni enda. Ipekeke Tuhan kita i bas kematen nari. La terjeng je ngenca, kalak Kristen arus nginget wari kematenna ras ersikap kerna wari kematenna e. Persikapenta labo persikapan doni misalna mpersiapkan kuburen, acara adat, mpesikap maneh-maneh ras sidebanna, perlun asa sie persikapenta eme persikapan kiniteken, gelah tetap setia seh mate, la mbewat-mbewat, makeken kesempatan guna erbahan si ngena ate Dibata tupung kita nggeluh denga. Megati mbiar kita mate, sabap si bayangken adi mate kita erjabu ka perbulangennta, mbiar ka kita ulihta latih e kalak sideban ngenanamisa, mbiar kita anakta terlantar ras sidebanna. Sie kerina la man arunken sabap aminna pe kita mate, kematen la ngasup nirangken kita ras Kristus. Aminna pe sirang kita ras kalak si ikelengi kita ras engkelengi kita erdandanken kematen tetap e jadi ende-enden pengataken bujur sabap kematen mbabai kita bengket ku bas kegeluhen rasa lalap.

### **Aktivitas Mengisi Eulogy.**

Eulogy ertina terakhir, perpudi kegeluhen. Eulogy isina kerna diri sekalak jelma si enggo mate janah iogeken i lebe-lebe jelma si nterem tupung jenazah i rumah denga. I bas kesempatan enda si bahan eulogy guna dirinta. Si bayangken tupung kita mate uga kecibalta, kai kesan keluarganta ras temanta kerna geluhta ras teladan kai si dat kalak i bas kita nari. Kai si langa si bahan i bas geluhta. Tujun ngisi eulogy enda, gelah kita ngidah geluhta ras mateta sada hal si utuh. Kai si langa si lakoken i bas geluhta lit denga kesempatan guna ngelakokenca ope kita mate.

### **Isi eulogy-nta**

Gelar :..... Tanggal lahir: .....

Mate i bas Tahun :..... Tutup usia :..... tahun

Gelar perbulangen (adi lit denga): ..... Jumlah anak: ....kalak

Jumlah kempu: ..... kalak Penyebab kematian: .....

Ise saja si ngelilingi peti jenazah: .....

Ritual/acara si niarapken: .....

Pencapaian si enggo idat (subuk i bas jabu, Gereja ras karier):

.....  
.....  
.....

Sura-sura si langa tersehi (tercapai) :

.....

.....  
.....

Rasa kecewa/menyasal si pernah terjadi :

.....  
.....  
.....

Kesan si niarapken i bas anak-anakta/kemputa man banta (kata-kata, pengajaren si icikepna):

.....  
.....  
.....

Pedahndu si terakhir man anak, kempu/si ikelengindu:

.....  
.....  
.....

Kenca dung isindu, turiken uga perasaandu, kai si banci ipelajarindu ras kai atendu ibahanndu ope kematen situhu-tuhu reh.

Pdt. Sariyani Barus MTh.